

un mucha rubiano pretu

Mañan nos ta bai
mi n'sa pakiko si
ma nan ta bisa ku mi tata
no ta rubiano
nan a chék su sanger kaba
i nan di ku tin hopi kos adén
ku ta parse di Korsou
kosnan indesente
asina nan ta bisa

si, nos ta bai mi'n sa pakiko
pero mamai a bira hopi malo
e ta yora semper
ku mi tata bisa
ku nan a zundri'é na trabou
pa "bestia stabachi"

mi tata ta tristo
el a yuda laba zeta na Lago
el a toka hopi biaha den karnaval
pa Tivoli, pa hopi hende i tambe pa La Reina
ma awor nos ta bai
mi n'sa pakiko nos tin ku bai
pero mamai a bira hopi malo
i nan ta bisa ku papai no ta rubiano

mi tambe ta tristo
pasobra mi ta bai laga Bubu ku Bencho
nan ta mi mihó amigo
ta pakiko mi tata
tin kos indesente den su sanger?

Henry Habibe.